

**Uunga siunnersuut: Namminersornerullutik Oqartussat kommunillu inissiaataannik  
attartortittakkanik inissiatut imaluunniit illutut nammineq pigisatut tiguisarneq  
pillugu Inatsisartut peqqussutaata allanngortinneqarnera pillugu Inatsisartut inatsisaat  
nr. xx, xx. xxx 2018-meersoq.**

**(Taarsigassarsianik sioqqutsilluni akiliisarneq)  
*Ineqarnermut Attaveqaqatigiinnermullu Naalakkersuisoq***

**pillugu**

**Sanaartornermut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Sanaartornermut Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, Siulittaasoq

Inatsisartunut ilaasortaq Peter Olsen, IA, Siulittaasup tullia

Inatsisartunut ilaasortaq Bentiaraq Ottosen, Atassut

Inatsisartunut ilaasortaq Justus Hansen, Demokraatit

Inatsisartunut ilaasortaq Pele Broberg, Parti Naleraq

UKA2018-imi ulloq 4. oktober siullermeerinninnerup kingorna Sanaartornermut  
Ataatsimiititaliap siunnersuut misissorpaa.

### **Siunnersuutip imarisai siunertaalu**

Pisortat inissiaatigisimasaannik tigusermut taarsigassarsisimasut taarsigassarsiumaartutut  
inissisimatinneqalernissaat inatsisissatut siunnersuummik siunertarineqarpoq. Taamaalillutik  
taarsigassarsiat siusinaarluni maannalu akiusut malillugit akilerneqarsinnaalissapput,  
tamannali aatsaat taarsigassarsinerup kingorna ukiut tallimat qaangiunneranni  
siusinnerpaamik pisinnaavoq.

### **1. Siunnersuutip Inatsisartuni siullermeerpeqarnera**

Siunnersuut partiinit tamanit taparserneqarluarpoq. Inatsisartunit naalakkersuinikkut  
isummernermik ersersitsineq taanna Sanaartornermut Ataatsimiititaliamit  
maluginiarneqarpoq.

Aaqqissuussinerup illunut nammineq sanaqataaffigisanut tunngatillugu taarsigassarsianut  
aamma atorneqarsinnaasunngorlugu siaruarneqarnissaa naatsorsuutigineqarnerasoq  
apeqqutigineqarpoq, tamatumunnga Naalakkersuisut itigartitsipput.

**Tusarniaanermut akissutit**

Tusarniaanermut akissutit inatsisissatut siunnersuummut ilanngussatut ikkunneqarsimapput, tamanna Inatsisartut Siulittaasoqarfiannit ilusiliinissamut piumasaqaataasunut naapertuuppoq.

Tusarniarneqarsimasut assigiinngitsut arlalissuusut ataatsimiititaliap maluginiarpaa, taamatullu inatsisissatut siunnersuut sapaatit akunnerini sisamani tusarniaassutigineqarsimasoq.

Taamaattorli ataatsimiititaliap aamma maluginiarpaa inatsisissatut siunnersuut aningaaserivinnut, realkreditinstitutinut kiisalu nunami kukkunerisuiisunut eqqartuussissuserisunullu aamma tusarniaassutigineqarsimasoq.

Pigisanik aalaakkaasunik pisinermi aningaasalersuisinnaaneq pillugu tamatumalu kingorna inissianik piginnittunut taaneqartut kingullit amerlasuutigut pisisumut siunnersuisartussaammata, piginnittut tusarniaanerup ingerlanneqarnerani toqqaannartumik peqataatinneqarsimasinnaanerit siunertamut pitsaasuusimassagaluarpoq.

Ataatsimiititaliali maluginiarpaa siunnersuut tunngavimmigut innuttaasunik naapitseriaasoq suliassaqaarfimmillu ilisimaneqartumik ilanngussisoq, tassami aqqissuussineruvoq taarsigassarseriaatsinut allanut 1. januar 2018-imi atuutsinneqalersoq, taamaammat ataatsimiititaliaq tassunga atatillugu allanik iliuuseqarniannilaq.

**Ataatsimiititaliap siunnersuummik suliarinninnera**

Nunami innuttaasut taarsersugassarsisullu inatsisissatut siunnersuut aqutigalugu assigiissaagaanerisumik pineqartussanngortut ataatsimiititaliap maluginiarpaa.

Aammattaaq ataatsimiititaliap maluginiarpaa amerlanerit taarsersukkaminik siusinaartumik akiliinerisigut assersuutigalugu inissiassanut nutaanut aningaasaliissutigeqqinneqarsinnaasunik taarsersugassarsititsisut utertitsiffigineqarnissaat siunnersuutip nassatarigaa.

**Siunnersuutip aningaasaqarnikkut kingunerisassai**

Siunnersuutip piviusunngortinneqaruni aningaasaqarnikkut kingunerisassai siunnersuummut nassuiaatini nalinginnaasuni allaaserineqarput. Pisortanit taarsigassarsiat siusinaarluni maannakkut naliusut malillugit akilernerqarsinnaalernerat pisortat missingersuusiatigut naatsorsuutigineqartumit siusinaarnerisumik aalajangersimasumik annertussusilimmik iluanaaruteqarsinnaanerit tassani allassimavoq.

Taarsigassarsisimasut qassit peeriarfissamik atuinissaat saqqummiunneqartut tunngavigalugit missingersorneqarsinnaanngilaq.

Siunnersuummi allassimasumit allaanerusumik naliliinissaminut ataatsimiititaliaq tunngavissaqarsorinngilaq.

### Ataatsimiititaliap inassuteqaatai

Tamanna tunngavigalugu siunnersuutip ilusimisuq iluseqartillugu Inatsisartunit akuersissutigineqarnissaa Ataatsimiititaliap isumaqatigiittup inassutigaa.

Ataatsimiititaliap taamatut oqaaseqaateqarluni isumaliutissiisummilu allassimanera naapertorlugu paasinnilluni siunnersuut aappassaaniigassanngortippaa.




---

Anders Olsen,  
Siulittaasoq




---

Bentiarq Ottosen




---

Peter Olsen,  
Siulittaasup tullia



---

Justus Hansen



---

Pele Broberg